

UiTM, MDN meterai MoU perkasa jaringan dakwah

Oleh **Mohd Iskandar Ibrahim** - Mac 29, 2022 @ 7:02pm

mohd_iskandar@bh.com.my



Pengerusi MDN, Prof Emeritus Datuk Dr Mahmood Zuhdi Abd Majid dan Rektor UiTM Cawangan Pahang, Prof Dr Mohd Ilham Adenan, bertukar dokumen selepas menandatangani MoU di antara kedua-dua pihak. NSTP/Ihsan UiTM

KUALA LUMPUR: Universiti Teknologi MARA (UiTM) dan Majlis Dakwah Negara (MDN) semalam menandatangani memorandum persefahaman (MoU) bagi membangunkan dan menambah baik jaringan institusi dakwah di Malaysia.

Majlis itu disempurnakan oleh Pengerusi MDN, Prof Emeritus Datuk Dr Mahmood Zuhdi Abd Majid dan Rektor UiTM Cawangan Pahang, Prof Dr Mohd Ilham Adenan sebagai langkah strategik mengukuhkan sinergi dan kerjasama dinamik ke arah mewujudkan rangkaian kelestarian pergerakan dakwah Islam di Malaysia.

Mahmood Zuhdi berkata, inisiatif kerjasama itu adalah bagi memperkuatkan aktiviti dakwah komuniti dan pendidikan.

Katanya, meskipun MDN mempunyai rakan strategik daripada pelbagai pihak, inilah MoU pertama diwujudkan oleh golongan muda MDN dengan pihak universiti.

"Dengan adanya kerjasama dengan rakan akademik dari universiti, kita boleh berjuang dan bekerja untuk bangsa kita, Insya-Allah kita tidak akan kehilangan banyak perkara."

"Saya ibaratkan orang Melayu dalam negara kita ini ibarat berpaut di dahan yang satu. Ibaratnya kalau patah dalam politik, kita patah dalam semua sekali."

"Oleh itu, saya rasa elok universiti boleh membantu dalam aktiviti komuniti dan pendidikan sejajar dengan cabaran semasa yang dihadapi oleh masyarakat setempat mahupun sejagat," katanya.

Jelasnya, kolaborasi itu amat bertepatan dan akan menjadi platform dalam merealisasikan pembangunan Pondok Perdana di Pahang.

Katanya, ia sebagai usaha menyalurkan maklumat dan menjadikannya pusat repositori subjek yang berkaitan dakwah dalam masyarakat, sekali gus dapat disebarluaskan kepada umum dengan lebih berfokus.

Sementara itu, Mohd Ilham menyambut baik MoU terbabit bagi menyuburkan aktiviti dakwah dengan meraikan, mengiktiraf dan bekerjasama dengan semua pihak.

"Jadikan UiTM ini sebagai platform sahaja, apa yang lebih penting adalah hasrat kita bagaimana untuk menggembungkan tenaga untuk satu rumah demi dakwah kita."

"UiTM rela menjadi sekretariat untuk menyediakan tempat dalam menjalankan misi dakwah kerana kebaikan UiTM adalah kita mempunyai cawangan di seluruh negeri," katanya.

Beliau berkata, jalinan kerjasama itu dapat menyebarluaskan rangkaian dakwah kepada masyarakat khususnya warga Pahang melalui projek Pondok Perdana yang sedang dibangunkan oleh MDN serta UiTM.

"Kebetulannya tempat yang MDN bangunkan Pondok Perdana itu di kawasan berdekatan dengan UiTM Jengka iaitu Kampung Awah. Lokasinya tidak jauh dari UiTM Jengka, hanya dalam setengah jam."

"Jadi, keperluan logistik boleh diaturkan oleh UiTM sekiranya ada apa-apa aktiviti yang ingin dijalankan oleh MDN. Inilah yang saya sebutkan bagaimana UiTM sendiri boleh menjadi tenaga penggerak dan platform untuk kita menjalankan aktiviti dakwah," katanya.